

Ilulissat ulloq 28.08. 2015

Inatsisartut suleriaasiat § 37 immikkoortoq 1 naapertorlugu matumuuna Naalakkersuisunut apeqquut imaattoq saqqummiuppara.

(inatsisartunut ilaasorta, Anthon Frederiksen, Partii Naleraq).

Naalakkersuisunut apeqquut/it:

1. Ukiorpassuarni aalisartuusimasut angallatip isaterneranut atatillugu aalisarnermut akuersissummik arsaarneqartarnerat sumik/sunik peqquteqarpa ?
2. Inuit ilaat inuunertik tamaat aalisarnerinnavimmik inuussutissarsiuteqarsimasut, apeqquut 1-imi pissutsit tunngavigalugit akuersissummik piiaaffigisaasimasut inuit pisinnaatitaaffiinik piiaaffigineqartutut nalilerneqarsinnaappaat ?
3. Sooq-una qeeraq 4 kg-miit oqimaannerusoq Royal Greenlandip tunisassiorfiinut tunineqarsinnaanngitsoq ?
4. Aalisakkat allat suut angivallaarnertik pissutigalugu RG-p tunisassiorfiinut tunineqarsinnaanngillat ? aamma suna/suut peqqutaappat taamaattoqarneranut ?
5. Aalisartut ilaasa tunitsivissaqannginneq pissutigalugu kilometererparujussuit atorlugit illoqarfinnut allanut tuniniaasariaqartarnerat Naalakkersuisut akuersaaginnarsinnaavaat ?
6. Sooq-una kapisillit aalisakkerivinnut tuneqqusaajunnaartut ?

Tunngavilersuut:

Aalisartut ilaanniit saaffigineqarnera tunngavigalugu apeqquutit qulaani taaneqartut naalakkersuisunit akineqarnissaat piumasaraara. Tassami inuit aalisarnerinnarmik inuunertik tamaat inuuniuteqarsimasut, sulilu pisinnaasut peqqissullu, angallatip pisoqalinera

pissutigalugu inuussutissarsiutiminnik piiaaffigineqartarnerat pinngitsoorani arlaatigut isornartoqarpoq.

Assersuutigigaannimi taxa-aatilik biiliminik pisoqalisoorcini pissutigiinnarlugu inuussutissarsiornermut allagartaminik piiaaffigineqarsinnaangilaq, taassumammi biili pisoqalisoq nutaamik taarsiinnariarlugu inuussutissarsiutinik ingerlateqqiinnartarpaa. Sooq assigiinngisitsineq taama atsigisoq atuutsinneqarpa ?

Aamma aalisartut nalunaarutigaat qeeqqat angisuut siornatigut tunisaasaraluartut maannakkut 4 kg sinnerlugu oqimaassusillit tunineqaqqusaajunnaarsimasut, soormita ?

Aalisartut ilaasa najukkaminni tunitsivissaqannginneq pissutigalugu ilaatigut navianartorsiornarsinnaasumik umiatsiaaraanaq atorlugu inoqarfinnut allanut tuniniaasariaqartarnerat akuersarneqarsinnaangitsoq aaqiivigineqartariaqartoq Partii Naleqqamiit isumaqarpugut.

Taamaammat aamma 12. August 2015 apeqqutinik qulaani pineqartunut assigusunik apeqquteqarpunga, kisianni suli akineqanngitsunik.

Canadap sineriaani angallaterpassuit imminnut aporaatinngersaallutik kapisilinniartut tv-kut isiginnaarlugit tupinnaqaaq, uffa-massa maani nunatta imartaani killilersuingaaratta aalisartortatta ilai unerartikkivut – pissutsit taamaattut ajorluinnarput akuersarneqarsinnaanatillu.

Ullut suliffiit qulit qaangiutinnginerini akineqarnissara kissaatingaara.

